

DOMENIE XXIII «VIE PAL AN»

Jutoris pe Liturgjie

Domenie, ai 9 di Setembar dal 2018

Tune interviste, Vito Mancuso un teolic nomenât di chescj timps, al scrîf che nella mia Bologna ci ritroviamo in messa in 25 alla domenica dentro mura maestose. Io chiedo: e fra dieci anni chi ci metterà più piede? La fede si trasmette soprattutto in famiglia. Ma le nuove famiglie non conoscono la Chiesa, non la riconoscono più.

Però, nol covente lâ fin a Bologne par nacuarzisi di chest fat. Al baste jentra tune glesie dal Friûl di domenie. Si pues propit dî che la nestre int e je diventade sorde a la peraule di Diu. Al è il câs dal vanzeli di vuê che nus cjacare di un om sort e mut. Lui, che al jere un paian, al à vude la furtune di incuintrâ Gjesù che lu à vuarît. Se nol incuintrave Gjesù al sarès restât sort e mut in vite.

Ce vino sintût te seconde leture di domenie passade? Che ogni bon regâl e ogni don refinît al ven di adalt e al ven jù dal Pari de lûs (Jc 1, 17). Noaltris no rivarìn mai a vierzi lis nestris orelis a la peraule di Diu di bessôi, ma o vin dibisugne che Gjesù nus meti i dêts tes orelis e, cu la salive, nus tocji la lenghe;

Gjesù po al alçà i vôi viers dal cîl, al suspirà e al disè: “Efata”, ch’al vûl dî: “Vierziti”. E a colp lis orelis si vierzerin...

Si lei te Apocalis: Chel che al à orelis, che al scolti ce che il Spirt ur dîs a lis glesiis (Ap 2, 11). Noaltris, cjalant a la nestre int, a lis nestris comunitâts, a la situazion, o vin ducj dibisugne di acetâsi sorts e muts e di svicinâsi a Gjesù che dome lui al pues dîchel Efeta-Vierziti che nus salve e al salvarà lis comunitâts.

Antifone di jentrade

Sal 118,137.124

Tu sês just, Signôr, e al va ben ce che tu distinis;
trate il to famei seont il to boncûr.

Colete

Diu, che di te nus diven la redenzie
e nus ven dade l’adozion,
cjale di bon voli i fîs dal to boncûr,
par che ducj chei ch’a crodin in Crist
a vedin sigurate la vere libertât e l’ereditât eterne.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 35,4-7

Lis orelis dai sorts si vierzaran, la lenghe dal mut e scriularà di gjonde.

Lis primis comunitâts cristianis a àn sintût che cheste antighe profezie si jere realizade in Gjesù. Di fat midiant di lui lis orelis dai sorts si vierzevin e la lenghe dal mut e scriulave di gjonde.

Noaltris, te nestre societât, o sin ancjemò tant lontans des imagjinis dal profete; par capî chest, al baste sintî un telegjornâl o stâ alc daûr a ce che al sucêt tal mont fra violencis, miseriis, imbrois, maçalizis e tristeriis.

Cuant che in cheste situazion il marum par no rivâ a cambiâ nus gafarà, ricuardînsi: Disêt ai cûrs sconsortâts: “Coragjo... No stait a vê pôre, ve il vuestri Diu! Al ven...”

Dal libri dal profete Isaie

Disêt ai cûrs sconsortâts:
«Coragjo! No stait a vê pôre,
ve il vuestri Diu!

Al ven cul svindic,
e je la pae di Diu,
lui al ven e us salvarà».
In chê volte si spalancaran i vôi dai vuarps,
e lis orellis dai sorts si vierzaran.
In chê volte il çuet al saltarà tant che un cerf,
e la lenghe dal mut e scriularà di gjonde,
parcè che lis aghis a spissularan tal desert
e i riui te pustote.
Il teren arsinîf al deventarà un palût,
e chel sec dut fodrât di risultivis di aghe.
Peraule di Diu.

SALM RESPONSORIÂL

dal Salm 145

Salm di grande fiducia te providence di Diu. Il miôr coment al sarès chel fat di un tribulât o di un sant o di une persone umile e fedele dai nestis paîs, chei che pape Francesc al clame: "I santi della porta accanto - i sants de puarte dongje". Dome lôr a puedin vê peraulis veris e sinceris par contâ lis maraveis di Diu metudis in chest salm.

Stin cun lôr e o podarìn cjantâ ancje nô:

Anime mê, laude il Signôr.

O ben:

R. Aleluia, aleluia, aleluia.

Se cjantât: Il cjant dai salms responsoriâi, p. 160.

Il Signôr al manten la sô fedeltât par simpri.

Ur fâs justizie ai tibiâts,

ur da il pan a di chei ch'a son afamâts.

Il Signôr i presonîrs al libere. **R.**

I vôi dai vuarps il Signôr al torne a vierzi,
il Signôr al torne a tirâ sù chei ch'a son par tiere,
il Signôr i vûl ben a la int juste,
il Signôr al vuarde la int foreste. **R.**

Al viôt dal vuarfin e de vedue,
impen che lis trainis dai triscj lis savolte.

Il Signôr al regnarà par simpri:

il to Diu, Sion, di ete in ete. **R.**

SECONDE LETURE

Jc 2,1-5

Diu no aial sielzût i puars di chest mont par fâju erêts dal ream?

San Jacum al è une vore clâr in ce che al dîs, tant clâr ma ancje tant difìcil di praticâ. Une volte, ma ancje cumò, si sintive, si sint a dî tes glesiis: "Bisugne stâ cui prins par judâ i ultims, al tocje stâ cui siôrs par judâ i puars". Ma chest resonament devant de peraule di Diu, nol sta in pîts.

S. Jacum nus al spieghe ben. Anzit nus vise che Diu al à sielzût i puars di chest mont par fâju siôrs inte fede.

Cheste veretât nus impegne a sielzi di ce bande - concretamentri - metisi e stâ.

De letare di san Jacum apuestul

Fradis miei, no stait a miscliçâ la vuestre fede tal Signôr nestri Gjesù Crist, Signôr de glorie, cun

preferencis par un o par chel altri. Metin ch'al jentri intune vuestre cunvigne un cuntun anel d'aur tal dêt, vistût di lusso, e ch'al jentri ancje un biât cuntune munture fruiade. Se vualtris si voltais viers di chel ben vistût e i disês: «Sentiti culî tal miôr puest», e i disês al biât: «Tu sta in pîts lajù» o ben: «Sentiti culî, daprûf dal gno scagn», no fasêso diferencis dentri di vualtris e no diventaiso judiçs ch'a judichin cun tristerie?

Scoltait, fradis miei cjârs: Diu no aial sielzût i puars di chest mont par fâju siôrs inte fede e erêts dal ream che ur à imprometût a di chei che i vuelin ben?

Peraule di Diu.

CJANT AL VANZELI

Mc 7,37

R. Aleluia, aleluia.

Al à fat propit dut ben!

Al fâs sintî i sorts e fevelâ i muts.

R. Aleluia.

VANZELI

7,31-37

Al fâs sintî i sorts e fevelâ i muts.

Za al inizi o vin dade une riflessione su chest vanzeli. Cumò o podaressin scoltâlu cun calme fermantsi e polsant a ogni peraule e azion di Gjesù e imaginant al ralentatôr, te veretât, che o soi jo chel sort e mut in plen teritori de Decapoli, tiere di paians e di pecjadôrs seont i Ebreus di chel timp.

Gjesù mi tire in bande, lontan de fole...e su di me al sospirà e al disè...

Dal vanzeli seont Marc

In chê volte, Gjesù, tornât a partî dal teritori di Tîr e passant par Sidon, al rivà tal mâr di Galilee, in plen teritori de Decapoli. I puartarin un om sort e mut e lu prearin di metii lis mans sul cjâf. Alore lui, dopo di vêlu tirât in bande, lontan de fole, i metè i dêts tes orelis e, cu la salive, i tocjà la lenghe; po al alçà i vôi viers dal cîl, al sospirà e al disè: «Efata», ch'al vûl dî: «Vierziti». E a colp lis sôs orelis si vierzerin e il grop de lenghe si disgropà, sichè al fevelave benon. Lui ur comandà di no dîjal a dinissun; ma plui lui ur al inibive e plui lôr lu publicavin; e tal colm de maravee a disevin:«Al à fat propit dut ben! Al fâs sintî i sorts e fevelâ i muts».

Peraule dal Signôr.

Su lis ufiertis

Diu, che di te e diven la vere devozion e la pàs,
danus di onorâ, cun chest regâl,
la tô maiestât in maniere conveniente
e, cu la partecipazion a chest misteri sant,
di sintîsi plui unîts fra di nô.

Par Crist nestri Signôr.

Antifone a la comunion

Sal 41,2-3

Come une cerve e gole un ruiuç di aghe,
cussì la mê anime ti gole te, gno Diu:
la mê anime e à sêt di Diu, dal Diu vîf.

O ben:

Zn 8,12

Jo o soi la lûs dal mont, al dîs il Signôr.
Chel ch'al ven daûr di me nol cjamine tal scûr,
ma al varà la lûs de vite.

Daspò de comunion

Diu, che tu nudrissis e tu fasis vivi i tiei fedêi
cu la tô peraule e cu la fuarce di chest sacrament dal cîl,
danus la gracie di cjapâ zovament dai tancj regâi dal to cjâr Fi
e di mertâ di spartî par simpri la sô vite.
Lui ch'al vîf e al regne tai secui dai secui.

* * *

Riflession di pre Antoni Beline: **Al fevelave ben**

Cumò ti àn cambiât su dut, ma une volte, cuant che si batiave, il predi al faseve propit chest at di Gjesù, di tocjâ lis orelis e la bocje cu la sô salive. Siguramentri che la mode moderne e je plui igjeniche, ma si capîs mancûl e no si pense che chel frutin nol pò ni scoltâ ni fevelâ, no dome parcè che al è piçul ma parcè che al à alc che i strope lis orelis par no che al sinti la vôs di Diu...

Vanzeli par un popul, an B, p. 154

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

**O vin ducj dibisugne di acetâsi “sorts e muts” e di svicinâsi a Gjesù
che dome lui al pues dî chel “Efatà-Vierziti” che nus salve.**

***La chiesa è come uno yogurt scaduto. E' fuori dal tempo.
Ricordo le straordinarie parole del cardinale Martini:
La Chiesa è indietro di almeno duecento anni.
Era la verità. Resta la verità.***

Vito Mancuso

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*